

1 **Din ed ils pertschien**

2 Jeu less buca segloriar, sai denton dir ch'jeu erel in scolar mediocher. En
3 matematica erel jeu plitost sur la media. Far quens era mia fermezia. Igl ei perquei
4 capeivel ch'jeu hai frequentau la scola commerciala e sun dapi onns contabilist
5 diplomau en ina fatschenta da muntada naziunala.

6 Denton ina gada ni l'autra scolel jeu il tgau, patertgond a miu conscolar da pli baul,
7 Din. Lez ha bein fatg tut ils onns dalla scola obligatorica da vischnaunca, mo buca tut
8 las classas. Ella veta ei Din denton secumprovaus talmein che jeu sun enqualgadas
9 quasi scuidus.

10 Din posseda ina fabrica che marscha, ha ina villa da luxus ed ina casa da vacanzas
11 en in bellezza liug sper il lag da nossa vischnaunca d'origin. Inagada el temps da
12 vacanzas sun jeu s'entupaus cun Din e nus havein rinfrestgau regurdientschas da pli
13 baul ed jeu hai priu la caschun per eruir il motiv dil success professional da miu
14 camerat da scola da pli baul.

15 Din ei staus reservaus in mument ed ha lu confidau il sequent detagl a mi: „Ti sas
16 che jeu erel ina nulla en scola primara!“

17 „Ina nulla less jeu buca dir“, rispundel jeu e cuntinueschel, „denton far quens era
18 buca tia fermezia.“

19 „Gest perquei hai jeu tertgau“, peglia Din puspei il plaid, „da bandunar aschi spert
20 sco pusseivel il baun da scola e da far il segl ora en la veta pratica.“

21 „Tgei emprendissadi has ti fatg?“

22 „Emprendissadi bein da gliez temps! Nov onns scola han tunschiu ed allura in segl
23 sco in vadi ora en la veta pratica.“

24 „Ei fa l'impressiun che ti hagies reussiu en la veta da professiun?“

25 „Jeu hai luvrau dus onns e suenter la scola da recruta hai jeu mess si fatschenta.“

26 „Bein in menaschi da producir barschuns?“

- 27 „Exact sco ti dis.“
- 28 „E co has fatg cun ils quens?“
- 29 „Quei ei bunamein stau pli sempel che la lavur manuala naven dalla damaun
30 entochen tard la sera.“
- 31 „Mo co allura?“
- 32 „Jeu vi dir quei a ti cun in exempel. Ils cuosts da fabricaziun eran in franc per
33 barschun. Jeu vendel il singul toc per treis francs e cun quels dus pertschien gudogn
34 hai jeu giu ina buna existencia ed jeu stun bein“, puntuescha Din en la maniera d'ina
35 persunalitad arrivada.
- 36 Jeu hai stuiu laguoter da vit pliras gadas e lu hai jeu mirau francamein sin Din ed hai
37 detg:
- 38 „Quei ei veramein stau buns pertschien!“

(tenor Toni Berther)